

Aner Žuljević, delegat SDP BiH u Domu naroda Parlamenta Federacije BiH

Sarajevo, 23.06.2016. godine

Primalac:
BOSNA I HERCEGOVINA
Federacija Bosne i Hercegovine
Dom naroda Parlamenta Federacije BiH
n/r predsjedavajuće, gosp. Lidija Bradara

Bosna i Hercegovina
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
DOM NARODA
SARAJEVO

Prilijeno: 23-06-2016			
Org. jed.	Broj	Priloga	Vrijednost
02-	02-	1373	16

Predmet: Prijedlog Rezolucije o osudi segregacije i diskriminacije u obrazovnom sistemu Bosne i Hercegovine

Poštovani,

U skladu sa članovima 13. i 141. Poslovnika o radu Doma naroda Parlamenta Federacije BiH (Službene novine Federacije Bosne i Hercegovine br. 27/03 i 21/09), ispred delegata SDP BiH u Domu naroda Parlamenta Federacije BiH, Domu naroda Parlamenta Federacije BiH prilažem na usvajanje Prijedlog Rezolucije o osudi segregacije i diskriminacije u obrazovnom sistemu Bosne i Hercegovine.

Delegat, Aner Žuljević,

Aner Žuljević

Prilog:

- Prijedlog Rezolucije Doma naroda Parlamenta Federacije BiH o osudi segregacije i diskriminacije u obrazovnom sistemu Bosne i Hercegovine

Aner Žuljević, delegat u Domu naroda FBiH

PRIJEDLOG

**REZOLUCIJA DOMA NARODA PARLAMENTA FEDERACIJE BOSNE I HERCEGOVINE
O OSUDI SEGREGACIJE I DISKRIMINACIJE U OBRAZOVNOM SISTEMU
BOSNE I HERCEGOVINE**

Sarajevo, juni/lipanj 2016. godine

Pozivajući se na Univerzalnu deklaraciju Ujedinjenih nacija o ljudskim pravima, Konvenciju Ujedinjenih nacija o pravima djeteta, Evropsku konvenciju o zaštiti ljudskih prava i sloboda sa Protokolima, Ustav Bosne i Hercegovine, Ustav Federacije Bosne i Hercegovine, Zakon o zabrani diskriminacije u Bosni i Hercegovini i Okvirni zakon o osnovnom i srednjem obrazovanju u Bosni i Hercegovini,

Uvažavajući presudu Vrhovnog suda Federacije Bosne i Hercegovine broj: 58 0 Ps 085653 13 Rev od 29.08.2014. godine,

Zastupajući princip da dijete treba da bude odgojeno u duhu mira, dostojanstva, tolerancije, slobode, jednakosti i solidarnosti,

Uzimajući u obzir značaj i raznovrsnost tradicija kao i zajedničkih kulturnih vrijednosti građana Federacije Bosne i Hercegovine za zaštitu i skladni razvitak djeteta,

Prihvatajući određenje da razvijanje svijesti o pripadnosti državi Bosni i Hercegovini, vlastitoj kulturnoj samosvijesti, jeziku i naslijeđu, u skladu civilizacijskim tekovinama, upoznavajući i uvažavajući druge i drugačije, poštujući različitosti i njegujući međusobno razumijevanje, trpeljivost i solidarnost među svim ljudima, narodima i zajednicama u Bosni i Hercegovini i svijetu spada u opće ciljeve obrazovanja u Bosni i Hercegovini,

Osuđujući neustavnu inicijativu za odjeljivanjem djece srednjoškolskog uzrasta formiranjem segregiranih srednjih škola u Jajcu, čije donošenje je podržala Skupština Srednjobosanskog kantona, u skladu sa članom IV A. 4.17. Ustava Federacije Bosne i Hercegovine i članom 141. Poslovnika o radu Doma naroda Parlamenta Federacije Bosne i Hercegovine, Dom naroda Parlamenta Federacije Bosne i Hercegovine donosi

REZOLUCIJU DOMA NARODA PARLAMENTA FEDERACIJE BOSNE I HERCEGOVINE O OSUDI SEGREGACIJE I DISKRIMINACIJE U OBRAZOVNOM SISTEMU BOSNE I HERCEGOVINE

Uzimajući u obzir u Preambuli navedene obvezujuće međunarodne i domaće akte, Dom naroda Parlamenta Federacije Bosne i Hercegovine osuđuje kontinuiranu provedbu segregacije i diskriminacije đaka u obrazovnom sistemu Bosne i Hercegovine, te poziva sve odgovorne domaće i međunarodne institucije, a naročito Vlade i Skupštine kantona u Federaciji Bosne i Hercegovine, načelnike Općina, gradonačelnike, te Općinska i Gradska vijeća u Federaciji Bosne i Hercegovine, kao i Ured visokog predstavnika za Bosnu i Hercegovinu i Misiju OSCE-a u Bosni i Hercegovini da poduzmu sve nužne mjere u skladu

sa svojim ovlaštenjima u cilju dokidanja svih oblika segregacije i diskriminacije u školstvu u Federaciji Bosne i Hercegovine, što naročito podrazumijeva sljedeće:

- Dom naroda Parlamenta Federacije Bosne i Hercegovine poziva odgovorne institucije, tijela, organe, političke subjekte i pojedince na obustavu, ukidanje i napuštanje svih oblika djelovanja koji potiču na segregiranje ili diskriminisanje đaka u Federaciji Bosne i Hercegovine po bilo kojem osnovu;
- Dom naroda poziva sve relevantne činitelje unutar obrazovnog sistema u Federaciji Bosne i Hercegovine na dosljednu primjenu zakonske regulative kojom je zabranjen svaki oblik segregacije i diskriminacije djece, uz poštivanje individualnih i kolektivnih prava i sloboda i osiguranje dostupnosti znanja iz oblasti jezika, kulture i naslijeđa svih građana i naroda u Bosni i Hercegovini u okvirima jedinstvenih nastavnih planova i programa;
- Dom naroda Parlamenta Federacije Bosne i Hercegovine traži neodložnu provedbu presude Vrhovnog suda Federacije Bosne i Hercegovine broj: 58 0 Ps 085653 13 Rev od 29.08.2014. godine, kojom je utvrđeno da su, Ministarstvo obrazovanja, nauke, kulture i sporta Hercegovačko-neretvanskog kantona, te Osnovna škola Stolac i Osnovna škola Čapljina organizovanjem škola na etničkom principu i donošenjem i primjenom školskih planova i programa na etničkom principu odvajali učenike u školama na području Hercegovačko-neretvanskog kantona na temelju njihove etničke pripadnosti čime su počinili diskriminaciju, shodno čemu je prvotuzenom u cilju prestanka dalje diskriminacije djece u školama na području Hercegovačko-neretvanskog kantona naloženo da ustanovi jedinstvene integrisane multikulture obrazovne ustanove-škole za utvrđena upisna područja sa jedinstvenim nastavnim naučnim planom i programom, uz puno poštovanje prava djece na obrazovanje na maternjem jeziku, a drugo- i trećetuženom da integracijom stvore osnov multikulturalnosti škole i obrazovanja djece bez obzira na etničku pripadnost, po jedinstvenom planu i programu na maternjem jeziku;
- Dom naroda Parlamenta Federacije Bosne i Hercegovine poziva Misiju OSCE-a u Bosni i Hercegovini i Ured visokog predstavnika za Bosnu i Hercegovinu da, postupajući u skladu sa svojim mandatima, te koristeći ustavna ovlaštenja poduzmu sve mjere kako bi praksa segregacije i diskriminacije kao ključna opasnost za opstanak i razvoj bosanskohercegovačkog društva kao pluralne, tolerantne društvene zajednice, bila dokinuta;
- Dom naroda Parlamenta Federacije Bosne i Hercegovine poziva nadležna pravosudna i policijska tijela i organe u Federaciji Bosne i Hercegovine na poduzimanje hitnih radnji kako bi provoditelji, štíćenici i promotori neustavne prakse segregacije, odnosno diskriminacije đaka u Federaciji BiH bili sankcionisani u skladu sa zakonom;
- Dom naroda Parlamenta Federacije Bosne i Hercegovine apeluje i poziva Dom naroda i Zastupnički dom Parlamentarne skupštine Bosne i Hercegovine da usvoje Rezoluciju o osudi segregacije i diskriminacije u obrazovnim sistemima u Bosni i Hercegovini, osuđujući naročito protivustavnu praksu osporavanja prava na upotrebu

naziva jezika u skladu sa Ustavom Bosne i Hercegovine u obrazovnom sistemu Republike Srpske, oblike segregacije i diskriminacije osuđene ovom Rezolucijom, te sve druge prepoznate oblike segregacije i diskriminacije u obrazovnim sistemima u Bosni i Hercegovini;

- Dom naroda Parlamenta Federacije Bosne i Hercegovine traži i očekuje hitno očitovanje svih subjekata koji su ovom Rezolucijom imenovani i pozvani na djelovanje, i to u roku ne dužem od 15 dana od dana donošenja Rezolucije.